

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- लोकसभा चुनां दे 7में ते खीरले गेड़ तैहत् राज्यें ते इक केन्द्र शासत प्रदेश च कल 57 लोकसभा सीटें लेई वोट पाए जा करदे न।
- इस गेड़ तैहत् 10 करोड़ 60 लक्ख कोला मते मतदाता 904 मेदवारें दे सियासी भविक्ख दा फैसला करने जा'रदे न।
- इक बड्डी ते महत्वपूर्ण गैह् पुट्टदे होई भारतीय रिजर्व बैंक नै बरतानिया थमां अपना 100 टन सुन्ना वापस लेई आंदा ऐ।
- उत्तर भारत दे केई होर हिस्से आला लेखा जम्मू च प्रांतै च बी गर्मी दा प्रकोप बरोबर जारी ऐ।

<><><><><><>

7th Phase

लोकसभा चुनां 2024 दे 7में ते खीरले गेड़ दा मतदान अज्ज होआ करदा ऐ। 7 राज्यें ते 1 केन्द्र शासत प्रदेश च फैली दिएं कुल 57 लोकसभा सीटें लेई वोट पाने दी प्रक्रिया बडलै 7 बजे शुरू होई चुकी दी ऐ जेहड़ी संजा 6 बजे तोड़ी चलोग। इस गैह् तैहत् 10 करोड़ 60 लक्ख कोला मते मतदाता कुल 904 मेदवारें दे सियासी भविक्ख दा फैसला करगंन। इस गेड़ तैहत् जेहड़ी सीटें लेई वोट पाए जा'रदे न, उंदे च उत्तर प्रदेश ते पंजाब दियां 13-13 सीटां, पच्छम बंगाल दियां 9, बिहार दियां 8, ओडिशा दियां 6, हिमाचल प्रदेश दियां 4, झारखंड दियां 3 ते केन्द्र शासत प्रदेश चंडीगढ़ दी 1 लोकसभा सीट शामिल ऐ। जेहड़े प्रमुख मेदवारें दा भविक्ख अज्ज दांव पर लग्गे दा ऐ उंदे च प्रधानमंत्री नरेन्द्र मोदी, सूचना ते प्रसारण मंत्री अनुराग सिंह ठाकुर, कांग्रेस दे विक्रमादित्य सिंह ते तृणमूल कांग्रेस दे अभिषेक बेनर्जी बी शामिल न। मतदान सब्बनें 8एं प्रदेशें च बडलै 7 बजे थमां शुरू होई चुके दा ऐ, जित्थें सुरक्षा दे अलावा मतदाताएं दी सुविधा लेई लोडचदे सब्बै बंदोबस्त कीते गेदे न। पंजाब च मतदाताएं दी गिनतरी 2 करोड़ 11 लक्ख कोला मती ऐ जिंदी सहूलत लेई 24 जहार 451 मतदान केन्द्र बनाए गेदे न। ओडिशा च 6 लोकसभा सीटें दे अलावा 42 असेंबली सीटें लेई बी वोट पोआए जा करदे न। गर्मी गी दिक्खदे होई मतदान केन्द्रें पर विशेष प्रबंध कीते गेदे न। बिहार च बी मतदान पूरी चाल्ली रमानदारी ते बवस्था आले ढंगै सिर जारी ऐ।

पच्छम बंगाल, झारखंड, हिमाचल प्रदेश ते चंडीगढ़ थमां बी मतदान केन्द्रें पर मतदाताएं दियां लम्मियां—लम्मियां रीगां लग्गी दियां होने दे समाचार हासल होआ करदे न। लोक बड़े जोश कन्नै अपने लोकतांत्रिक अधिकार दा इस्तेमाल करने लेई अपनी अपनी बारी गी बलगा करदे न।

<><><><><><>

PM-Appeal

प्रधानमंत्री ते बीजेपी दे वरिष्ठ नेता नरेन्द्र मोदी होरें मतदाताएं गी अपील कीती ऐ जे ओ वोट पाने दे अपने अधिकार दा इस्तेमाल करने लेई मती गिनतरी च मतदान केन्द्रें पर जाइयै अपना एह फर्ज निभान। अपनी इक सोशल मीडिया पोस्ट च मोदी होरें मतदाताएं गी टकोहूदा करियै नोजवानें ते महिलाएं गी अपील कीती ऐ जे ओ रिकार्ड गिनतरी च वोट पान ते लोकतंत्र गी होर मता समावेशी, जानदार ते मजबूत बनाने च सैहयोग देन।

<><><><><><>

CS-GMC

मुख्य सचिव अटल डुल्लू होरें कल सरकारी मैडिकल कालेज जम्मू दा दौरा लाया ते जंदे रोज अखनूर च होए दे सड़क हादसे दे जख्मिं दी डौल पुच्छी, जिंदा उत्थें इलाज चले करदा ऐ। मुख्य सचिव होरें इस हादसे गी इक बड़ा गै मंदे भागें आला करार दिंदे होई अस्पताल प्रशासन गी निर्देश दित्ता जे घायलें गी इलाज दी हर मुमकिन ते बेहतर कोला बेहतर सुविधा उपलब्ध कराई जा तां जे ओह तौले नरोए होई सकन। उनें हादसे च मारे गेदे लोकें दे परिवार आले कन्नै गैहरा दुख ते हमदर्दी प्रगट कीती ते जख्मिं गी इलाज मुआलजे दी हर मुमकिन सुविधा देने दा भरोसा दोआया। ध्यानजोग ऐ जे यात्रिं गी लेइयै शि खोड़ी जा'रदी इस बस अखनूर कश हादसे दा शकार होइ गेई ही जेहदे च 22 यात्रिं दी मौत होई गेई हीते केई घायल होई गेदे हे।

<><><><><><>

JK-Tourism

जम्मू कश्मीर च जित्थें इक बक्खी सैलसफा गी बढ़ावा देने लेई केई हीलें कीते जा'रदे न ते सैलानिं दा इत्थें औना बी नमें रिकार्ड कायम करा करदा ऐ, उत्थें गै प्रशासन नै सरबंधत डिप्टी कमीशनरें दी अध्यक्षता च जिला सतह दिं कमेअिडं दा गठन कीता ऐ जेहड़ियां केन्द्र शासत प्रदेश च 5 स्टार होटल बनाने लेई जिमिं दी शनाख्त करगंन।

आकाशवाणी दे जम्मू संवाददाता नै जानकारी दित्ती ऐ जे एह कारवाई उसलै कीती जा'रदी ऐ जिसलै जे मुखै दे बक्ख-बक्ख हिससें दे इलावा विदेशें थमां बी खरी मती गिनतरी सैलानिएं सैर सपाटे लेई जम्मू कश्मीर दा रूक्ख करा करदे न ते मई म्हीने दे अंदर तगर 10 लक्ख कोला मते सैलानी कश्मीर घाटी दी सैर लेई आई चुके दे हे ।

<><><><><><>

Lavender Bhaderwah

डोडा जिले दे भद्रवाह इलाके दे लवेंडर दी खेती करने आले ज्हारां करसान बड़े मते खुश न की जे इस बहार च समें सिर बरखा ते साजगार मौसम दी रिपोर्ट दे चलदे उनेंगी इक शैल फसल होने दी मेद ऐ। दऊं ब'रें पैहले इलाके च शुरू कीते गेदे इस रोजगार थमां करसाने गी फायदा हासल होने दी बड़ी मती मेद ऐ की जे ओह जानदे न जे इनें सुक्के दे फुल्लें दी राष्ट्रीय बजारें च किन्नी मंग ऐ। आकाशवाणी कन्नै गल्ल करदे होई किश करसाने ते उद्यमी नै दस्सेआ.....

<><><><><><>

E-Court

जम्मू कश्मीर ते लद्दाख दे मुख् न्यायधीश जस्टिस एन.कुटीश्वर सिंह होरें कल वर्चुअल ढंगै नै दऊं दिनें दे ई-अदालतें शड़े त्रै बारे क्षेत्रीय समूह दी इक कार्जशाला दा उद्घाटन कीता। जम्मू कश्मीर न्यायिक अकादमी श्रीनगर च लोआई गेदी इक कार्जशाला टकोहदे तौरा पर उत्तरी जोन होई कोर्टे लेई ऐ। इस मौके पर बोलदे होई मुख् न्यायधीश होरें आखेआ इस त्रीए गेड़ दी मदद कन्नै भारती न्याय बवस्था अंदर औने आले दिने च केई महत्वपूर्ण बदलाव औने आले न। इस कार्जशाला च दिल्ली, उत्तराखंड, राजस्थान ते अलाहाबाद हाई कोर्टे दे इलावा जम्मू कश्मीर ते लद्दाख दे हाई कोर्टे बी हिस्सा लै करदे न। कार्जशाला दी सदरत सुप्रीम कोर्टे दी ई-कमेटी ते एनआईसी, पुणे टीम करा करदा ऐ।

<><><><><><>

RBI-Gold

भारतीय रिजर्व बैंक नै बरतानिया थमां इक सौ टन कोला मता अपना सुन्ना वापस भारत लेई आंदा ऐ। एह केन्द्री बैंक दी आर्थिक नीति च इक बड्डा बदलाव ऐ। एहदे नै भारत दी आर्थिक सम्प्रभुता ते कुलसंसारी बजार पर बी महत्वपूर्ण असर पौग। दुनिया दे ज्यादातर मुल्ख अपना सुन्ना बैंक ऑफ इंग्लैंड जां ऐसे कुसै होर मुल्खे च जमा रखदे न। एहदे लेई उनेंगी बकायदा इक फीस दा भुगतान बी करना पौंदा ऐ। मजूदा समें च भारत कश 11 म्हीने दे आयात लेई सुद्दा विदेशी मुद्रा भंडार ऐ। इस ब'रे 31 मार्च तगर भारतीय रिजर्व बैंक कश कुल 822 मीट्रिक टन कोला मता सुन्ना जमा हा।

<><><><><><>

Ramban Gool Traffic

रामबन गूल शिड़क जेहड़ी पिछले इक म्हीने थमां बंद ही की जे रामबन जिले दे परनोट ग्रां च डेढ़ किलोमीटर दे इलाके च जिमीं धस्सी गोदी ऐ। अधिकारिएं उस इलाके च गड्डिएं दी आओजाई गी दस्ती तौरा पर ब्हाल करी दित्ता ऐ। उत्थूं दे मकामी लोकें राहत दे साह लैते न ते आकाशवाणी दे संवाददाता कन्नै गल्ल करदे होई उत्थूं दे इक मकामी डरैवर ते इक मकामी बसनीक नै गलाया.....

<><><><><><>

No Tabacoo Day

केन्द्र शासत प्रदेश च कल बक्ख-बक्ख थाहरें पर विश्व तम्बाकू निषेद दिवस दे सिलसिले च नेकां कार्यक्रमें दा आयोजन कीता गेदा हा। न्यायिक सेवाएं सरबन्धी प्राधिकरण नै कल श्रीनगर च विश्व तम्बाकू निषेद ध्याड़े पर इक जागरूकता कार्यक्रम दा आयोजन कीता। जम्मू कश्मीर ते लद्दाख हाई कोर्ट दे जज न्यायधीश ताशी रबस्तान होर इस मौके पर मुख परौहने हे? जिनें युवा पीढ़ी गी तम्बाकू दे खतरे ते ओहदे नुक्सान बारे जानकार बनाना हा। उनें जोर देइयै आखेआ ऐ जे पढे लिखे लोकें दे प्रयासें कन्नै गै तम्बाकू मुक्त समाज बनाया जाई सकदा ऐ।

<><><><><><>

E-Challan Doda

शिड़क सुरक्षा गी बढावा देने ते ट्रैफिक दे नियम बनाए रखने आस्तै कल डोडा च डोडा-किश्तवाड़ राष्ट्रीय जरनैली शिड़क 244 पर एआरटीओ राजेश गुप्ता हुंदी अगुवाई च चलान अभियान चलाया गेआ। इस अभियान दा मकसद मती स्पीड, ओवर लोडिंग समेत होर मते सारे उल्लंघने च कमी आहनने लेई चलाया गेआ। मोटर गडिडएं सरबंधी अधिकारिएं दी टीम नै कल 1 लक्ख 19 ज्हार रपें दे 46 ई-चलान कीते।

<><><><><><>

Weather

जम्मू दे मैदानी इलाकें च गर्मी दी लैहर अजें बी बरोबर जारी ऐ ते खुश्क ते गर्म मौसम करी आम जीवन च कोई राहत नेई थहोई ऐ। जम्मू च कल बद्धोबद्ध तापमान 43.7 डिग्री सैल्सियस दर्ज कीता गेआ ऐ ते रातीं दा घट्टोघट्ट तापमान 28.5 डिग्री सैल्सियस दर्ज कीता गेआ ऐ। मौसम विभाग नै अज्ज किश थाहरें पर बिजली चमकने ते बरखा दी पेशगोई कीती ऐ ते सोमवार थमां परतियै गर्मी दा प्रकोप बरोबर जारी रौहग।

<><><><><><>